


Los ntawm Thawj Tswj  
Hwm Henry B. Eyring  
Tus Pab Cuam thib Ib hauv  
Thawj Pawg Thawj Tswj Hwm



# Nej tej Kev Xyiv Fab Yuav Ntau Npaum Li Cas

**T**suas muaj ob peb yam kev xyiv fab xwb thiaj qab zib thiab kav ntev dua qhov uas yus paub hais tias yus tau pab lwm tus neeg coj Yexus Khetos txoj moo zoo uas txum tim rov qab los los rau hauv lawv tej siab tej ntsws. Qhov uas muaj txoj kev xyiv fab no yog ib lub cib fim ntawm txhua tus mej zeej uas koom lub Koom Txoos. Thaum peb tau ua kev cai raus dej, peb tau cog lus tseg hais tias peb yuav “sawv ua Vajtswv tej tim khawv rau txhua lub caij nyoog thiab rau tag nrho txhua txhia yam, thiab nyob tag nrho txhua qhov chaw uas [pe] yuav nyob, kom mus txog thaum tuag, xwv kom [peb] yuav raug txhiv dim los ntawm Vajtswv, thiab raug suav nrog cov uas nyob hauv thawj txoj kev sawv hauv qhov tuag rov qab los, xwv kom [peb] yuav tau txoj sia nyob mus ib txhis” (Mauxiyas 18:9).

Tag nrho cov mej zeej txais yuav ib feem ntawm txoj kev txib rau lub Koom Txoos kom coj tau Yexus Khetos txoj moo zoo mus rau lub ntiaj teb, txawm yog lawv nyob qhov twg los yog lawv nyob ntev npaum li cas. Tus Tswv tau hais meej meej hais tias: “Saib seb, kuv tau txib kom nej mus ua tim khawv thiab ceeb toom cov neeg, thiab tsim nyog txhua tus neeg uas twb tau txais lus ceeb toom lawm mus ceeb toom nws tus neeg zej zog thiab” (D&C 88:81). Cov tub txib qhia txoj moo zoo

yuav muaj lub hwj chim qhia lawv cov uas tseem tsis tau yog mej zeej hauv lub Koom Txoos. Cov mej zeej ntawm lub Koom Txoos yuav muaj lub hwj chim kom nrhiav tau lawv cov uas tus Tswv tau npaj rau cov tub txib qhia txoj moo zoo rau.

Peb yuav tsum rau rau siab ntseeg hais tias tus Tswv tau npaj ib co neeg ib ncig ntawm peb kom txais tej kev qhia no. Vajtswv paub hais tias lawv yog leej twg thiab thaum twg lawv yuav npaj lawm, thiab Nws yuav coj tau peb mus nrhiav tau lawv dhau ntawm lub hwj chim ntawm tus Vaj Ntsuj Plig Dawb Huv thiab pab peb hais tau cov lus tsim nyog kom thiaj caw tau lawv los mloog cov lus qhia. Lo lus cog tseg uas tus Tswv hais rau tus tub txib thaum xyoo 1832 kuj yog lo lus cog tseg uas Nws hais rau peb thaum Nws txib kom peb nrhiav kom tau cov neeg uas npaj lawm cia cov tub txib qhia txoj moo zoo rau lawv, Nws hais tias: “Kuv mam li xa tus Nplij Siab los roos nws, uas yuav qhia qhov tseeb rau nws thiab saib nws yuav tsum mus qhov twg; thiab yog tias nws rau siab ntseeg, kuv mam li muab tej re nplej pub rau nws ua kaus mom vaj ntxwv” (D&C 79:2–3).

Thiab lo lus cog tseg uas hais tias tus tub txib uas muaj siab ntseeg yuav muaj kev xyiv fab heev kuj yog cog lus tseg rau peb cov mej zeej uas rau siab ntseeg thiab rau siab tshaj tawm txoj moo zoo.

“Thiab nim no, yog tias nej yuav muaj kev xyiv fab heev vim yog ib tug neeg nkaus xwb uas nej tau coj los cuag kuv hauv kuv Leej Txiv lub nceeg vaj, nej txoj kev xyiv fab yuav hov loj yog tias nej coj tau coob tug neeg los cuag kuv!

“Saib seb, nej muaj kuv txoj moo zoo rau ntawm nej hauv ntej, thiab kuv lub pob zeb, thiab kuv txoj kev cawm seej.

“Thov Leej Txiv tuav kuv lub npe, muaj siab ntseeg hais tias nej yuav txais tau, thiab nej yuav muaj tus Vaj Ntsuj Plig Dawb Huv nrog nej nyob, uas tshwm sim txhua tsav txhia yam uas tsim nyog rau noob neej” (D&C 18:16–18).

Ntxiv rau tus Vaj Ntsuj Plig Dawb Huv uas yuav pab peb pom tau thiab caw tau lawv cov uas twb npaj kawm txoj moo zoo lawm, tus Tswv tau hu thiab cob qhia ib co thawj coj los mus coj peb kev thiab. Hauv ib tsab ntawv uas muaj hnuv nyoog lub Ob Hlis Ntuj hnuv tim 28, 2002, Thawj Pawg Thawj Tswj Hwm tau muab lub luag hauj lwm lav txoj hauj lwm tshaj tawm txoj moo zoo rau cov npis sov thiab tej pawg ntseeg ris feem ntau.<sup>1</sup> Ua ke nrog tej kev pab los ntawm pawg ntseeg los yog ceg ntseeg pawg sab laj, pawg pov thawj hwj lub rooj tsav xwm coj kev npaj ib lub tswv yim tshaj tawm txoj moo zoo uas pawg ntseeg los yog ceg ntseeg yuav siv. Ua ke nrog lub tswv yim ntawd yog ob peb yam uas qhia saib cov mej zeej yuav ua li cas nrhiav tau cov neeg uas twb npaj lawm txais cov tub txib los qhia txoj moo zoo rau lawv. Muaj ib tug neeg uas lawv hu los mus ua pawg ntseeg los yog ceg ntseeg tus thawj coj saib xyuas kev tshaj tawm txoj moo zoo. Tus saib xyuas kev tshaj tawm txoj moo zoo ntawd nrog cov tub txib uas ua hauj lwm tshaj tawm txoj moo zoo puv sij hawm thiab lawv cov uas txaus siab kawm txoj moo zoo sib raug zoo.

Muaj ob peb yam koj ua tau uas yuav pab koj ua tiav koj lub luag hauj lwm thiab txoj kev lav ris kom nrhiav tau neeg rau cov tub txib qhia txoj moo zoo rau. Qhov yooj yim tshaj yog qhov zoo tshaj thiab.

Thov Vajtswv kom tus Vaj Ntsuj Plig Dawb Huv coj koj kev. Nrog cov thawj coj nyob ze thiab cov tub txib sib tham, nug lawv saib lawv muaj tswv yim li cas, thiab cog lus tias koj yuav pab lawv. Yaum thiab txhawb nqa lawv cov uas nrog koj ua tej hauj lwm no. Thiab ua ib tug tim khawv tag nrho txhua lub sij hawm rau ntawm tej yam uas koj hais thiab ua kom

thiaj ua tim khawv qhia hais tias Yexus yog tus Khetos thiab Vajtswv teb cov lus thov txog Nws.

Kuv ua tim khawv hais tias tus Vaj Ntsuj Plig Dawb Huv yuav coj koj mus cuag cov uas nrhiav kom tau qhov tseeb thaum koj thov Vajtswv thiab ua hauj lwm kom tau kev coj kev ntawd. Thiab kuv paub dhau los ntawm tej yam uas tau muaj los rau kuv hais tias koj txoj kev xyiv fab yuav kav ntev ua ke nrog lawv cov uas txais txoj moo zoo los rau hauv lawv tej nruab siab thiab txawm muaj siab ntseeg nyiaj ntev mus.

#### LUS CIM

1. Saib “News of the Church: Ward and Branch Missionary Work Emphasized,” *Liahona*, lub Yim Hli Ntuj 2002, 4.

---

## QHIA LOS NTAWM TSAB XOY NO

- *Teaching, No Greater Call* qhia peb yaum kom lawv cov uas peb qhia cuab hom phiaj kom pab lawv ua neej raws li tej ntsiab cai uas lawv tau kawm lawm (saib phab 159). Ua ke nrog tsev neeg, xav saib puas tsim nyog txheeb xyuas tej koob hmoov ntawm tej hauj lwm ua tub txib tshaj tawm txoj moo zoo raws li Thawj Tswj Hwm Eyring hais txog, thiab yog tias tus ntsuj plig tshoov koj lub siab kom ua li no, caw tsev neeg cuab hom phiaj kom qhia txoj moo zoo rau lwm tus neeg.
- Xav saib puas tsim nyog nrog tsev neeg tawm tswv yim txog tej yam uas lawv ua tau kom qhia txoj moo zoo rau lwm tus neeg, es nco qab ntsoov Thawj Tswj Hwm Eyring cov lus ntuas hais tias “qhov yooj yim tshaj yog qhov zoo tshaj thiab.” Kom kawm ntxiv txog kev tawm tswv yim li hais no, cia li saib *Teaching, No Greater Call*, phab 160.

## COV HLUAS

### Cov Tub Txib Coob tug hauv Kuv lub Neej

Los ntawm Elizabeth S. Stiles

**T**hawj hnuv Sunday uas kuv nrog ob tug tub txib mus tom lub koom txoos, kuv pom ib co neeg uas kuv tau nrog loj hlob thiab paub zoo hauv kuv koog zej zog. Kuv pom kuv ib tug phooj ywg zoo uas kuv tau nrog mus kawm ntawv, ob tug neeg saib xyuas cov

ntaub ntawv tom ob lub tsev kawm ntawv theem pib thiab theem nrab, ib tug ntshais hluas uas kuv tsis tshua ua zoo rau yav nram ntej, thiab ib tug tub hluas uas muaj ib zaug kuv tau nyiam heev.

Cov neeg no txhua tus tau ua yam ntxwv zoo heev rau kuv. Kuv tus phooj ywg zoo tshaj yog ib tug ntshais hluas uas coj ncaj ncees, thiab vim yog nws tus yam ntxwv, kuv txiav txim siab kawm ntxiv txog lub Koom Txoos. Ob tug neeg saib xyuas ntaub ntawv tom tsev kawm ntawv nco qab txog kuv thiab pab kuv paub hais tias nkawd saib kuv ua neeg tseem ceeb. Kuv kawm txog Vajtswv txoj kev hlub thiab txoj kev siab hlub los ntawm tus ntshais hluas uas txais tos kuv txawm hais tias kuv tsis tshua ua zoo rau nws yav nram ntej. Tus tub hluas uas kuv tau nyiam heev tau coj yam ntxwv zoo heev rau kuv, npaum li tias kuv pom tau nws qhov kaj thiab xav nyob ze nws.

Tej yam uas muaj no rau kuv no pab kuv kawm, twb yog ua ntej kuv tau ntsib cov tub txib, hais tias Leej Txiv Saum Ntuj Ceeb Tsheej tau npaj kuv txais txoj moo zoo dhau los ntawm cov neeg uas Nws muab tso ib ncig ntawm kuv. Los ntawm lawv txhua tus kuv kawm hais tias tej yam me me uas peb ua kuj pab ua yam ntxwv tau rau lwm tus neeg. Qhov tseem ceeb tshaj, kuv tau kawm hais tias tej hauj lwm ua tub txib tshaj tawm txoj moo zoo pib rau ntawm kuv.

## COV ME NYUAM

### Txoj Moo Zoo—ib lub Txiaj Ntsim Muab Faib Qhia rau Lwm tus Neeg

Lo lus *txoj moo zoo* txhais tau hais tias tag nrho tej lus qhuab qhia thiab tej kab ke uas Yexus Khetos thiab Nws cov yaj saub tau muab pub rau peb lawm. Txoj moo zoo zoo ib yam li ib lub tawb uas peb Leej Txiv Saum Ntuj Ceeb Tsheej tau muab khoom plig ntim tag rau hauv kom puv nkaus. Koj muaj peev xwm pab muab tej txiaj ntsim no pub rau lwm tus neeg. Puas muaj leej twg uas koj xav qhia txoj moo zoo rau ua khoom plig pub rau nws?

Nyeem cov vaj lug kub nram qab no txhua nqes thiab teev tseg los yog teeb duab txog ob peb lub txiaj ntsim uas txoj moo zoo muaj rau peb.

1. Yakaunpaus 5:14–15
2. Mauxiyas 16:6–7
3. 3 Nifais 18:1–10
4. D&C 20:72–73
5. D&C 33:16
6. D&C 89:4, 18–21
7. D&C 132:46
8. D&C 137:10
9. D&C 138:32–34



# Kev Txum Tim Rov Qab Los Txhua Tsav Txhia Yam

*Ua tib zoo kawm tej ntaub ntawv no thiab, raws li qhov tsim nyog, nrog cov viv ncaus uas koj mus xyuas siab tham txog tej no. Siv cov lus nug kom pab ntxiv dag zog rau koj cov viv ncaus thiab kom thiaj nruab tau lub Koom Haum Niam Tsev tej kev koj ua rau hauv koj lub neej.*

**Kev Ntseeg • Tsev Neeg • Kev Pab**

**T**us Yaj Saub Yauxej Xamiv tau txhim tsa lub Koom Haum Niam Tsev ua ib feem tseem ceeb kawg ntawm lub Koom Txoos. Ua ib pawg thawj tswj hwm, peb cia siab hais tias peb yuav pab tau nej kom to taub yog vim li cas lub Koom Haum Niam Tsev thiaj tseem ceeb rau nej lub neej.

Peb paub hais tias cov poj niam hauv Phau Tshiab muaj siab ntseeg rau ntawm Yexus Khetos thiab koom pab Nws ua Nws tej hauj lwm. Lukas 10:39 hais txog Malis, uas “los zaum ntawm Yexus ko taw thiab mloog Yexus qhia.” Hauv Yauhas 11:27 Mathas ua tim khawv txog Khetos hais tias: “Mathas teb hais tias, Yog tiag, tus Tswv! Kuv ntseeg hais tias koj yog tus Mexiyas uas yog Vajtswv tus Tub uas los rau hauv ntiaj teb no.” Cov Tub Txib 9:36, 39 hais txog “ib tug poj niam hu ua Tanpithas, . . . niaj hnuv ua zoo thiab pab cov neeg txom nyem. . . . Cov poj ntsuam los sawv vij Petus . . . kom Petus saib tej tsho loj tsho me uas thaum Daulakas tseem ua neej nyob, Daulakas xaws rau lawv hnav.” Fempis, hauv Loo 16:1–2, yog “ib tug uas ua hauj lwm pab cov ntseeg” thiab “pab txhua leej txhia tus.”

Tej qauv ntawm kev ntseeg, lus tim khawv, thiab kev pab lwm tus neeg no tseem muaj hauv lub Koom Txoos hauv hnuv nyooog kawg no thiab yog kho kom muaj chaw txawb chaw rau thaum txhim tsa lub Koom Haum Niam Tsev. Julie B. Beck, lub Koom Haum Niam Tsev tus tuam thawj tswj hwm, tau qhia hais tias: “Ib yam li tus Cawm Seej tau caw Malis thiab Mathas hauv Phau Tshiab kom nrog Nws koom ua Nws tej hauj lwm, cov poj niam hauv lub caij nyooog kawg no kuj muaj ib txoj kev lav ris kom koom ua tus Tswv tej hauj lwm thiab. . . . Qhov kev txhim tsa lub Koom Haum Niam Tsev thaum xyoo 1842 koj ib tsoom poj niam tej hwj chim los nyob ua ke kom thiaj muaj zog thiab tau muab hauj lwm rau cov poj niam kom pab txhim tsa tau tus Tswv lub nceeg vaj.”<sup>1</sup>

Peb ua tiav tau peb tej hauj lwm thaum peb tsom ntsoov lub Koom Haum Niam Tsev lub hom phiaj: kom pab tib neeg muaj kev ntseeg thiab kev ncaj ncees ntxiv, kom ntxiv dag zog rau tej vaj tse thiab tej tsev neeg, thiab kom nrhiav tau thiab pab tau cov neeg txom nyem.

Kuv ua tim khawv hais tias Vajtswv tau txhim tsa lub Koom

Haum Niam Tsev kom thiaj pab khiav tej hauj lwm ntawm txoj kev cawm seej. Txhua tus viv ncaus hauv lub Koom Haum Niam Tsev muaj ib lub luag hauj lwm ua kom thiaj ua tiav tej hauj lwm dawb ceev no.

*Silvia H. Allred, tus pab cuam thib ib hauv lub Koom Haum Niam Tsev pawg tuam thawj tswj hwm.*

## **Los ntawm cov Vaj Lug Kub**

Yau-ees 2:28–29; Lukas 10:38–42; Efexaus 1:10

## **Los ntawm Peb zaj Keeb Kwm**

Tus viv ncaus Julie B. Beck tau qhia hais tias “peb paub dhau los ntawm tus Yaj Saub Yauxej Xamiv hais tias lub Koom Haum Niam Tsev yog ib feem tseem ceeb ntawm txoj Kev Txum Tim txoj Moo Zoo Rov Qab Los.”<sup>2</sup> Tej hauj lawm txum tim txoj moo zoo rov qab los pib rau ntawm Thawj qhov Ua Yog Toog Pom thaum xyoo 1820 thiab mus txuas ntxiv “ib kab tag mam li ib kab, ib zaj tag mam li ib zaj” (D&C 98:12). Thaum lub Koom Haum Niam Tsev raug txhim tsa thaum lub Peb Hlis Ntuj hnuv tim 17, 1842, tus Yaj Saub tau qhia cov poj niam txog lawv txoj hauj lwm tseem ceeb hauv

lub Koom Txoos uas tau txum tim rov qab los. Nws hais tias, “Lub Koom Txoos tseem tsis tau txhim tsa tas zoo tag nrho mus txog thaum txhim tsa lub koom haum niam tsev.”<sup>3</sup>

**LUS CIM**

1. Julie B. Beck, “Fulfilling the Purpose of Relief Society,” *Liahona*, Kaum Ib Hlis Ntuj 2008, 108.
2. Julie B. Beck, “Fulfilling the Purpose of Relief Society,” 108.
3. *Teachings of Presidents of the Church: Joseph Smith* (2007), 451.

***Kuv Yuav Pab Li Cas?***

**1.** Kuv yuav ua dab tsi pab kuv cov viv ncaus lub hli no kom thiaj ua yam ntxwv txog txoj kev ntseeg ntawm cov poj niam uas muaj siab ntseeg Yexus Khetos?

**2.** Kuv yuav kawm cov lus qhuab qhia dab tsi ntawm txoj moo zoo uas txum tim rov qab los kom thiaj ntxiv dag zog rau kuv zaj lus tim khawv lub hli no?

Kom tau ntaub ntawv xov xwm ntxiv, cia li txuas rau [www.reliefsociety.lds.org](http://www.reliefsociety.lds.org).